



*Komisija za Statut i akte*

Broj: 04-GV-04-1412/22  
Sarajevo, 22.09.2022. godine

*ZAPISNIK O RADU*  
*42. SJEDNICE KOMISIJE ZA STATUT I AKTE*  
*GRADSKOG VIJEĆA GRADA SARAJEVA*  
*održane 22.09.2022. godine*

Prisutni:

1. Toni Vukadin, predsjedavajući,
2. Dženan Tikveša, zamjenik predsjedavajućeg
3. Srđan Simonović, po ovlaštenju umjesto Alme Čengić, članice
4. Selvira Vilić, članica
5. Drago Jurić, član
6. Bajro Biber, član
7. Nihad Uk, član
8. Muamer Mekić, član
9. Vedran Dodik, član

Sjednici iz Stručne službe Gradskog vijeća Grada Sarajeva prisustvuje:

- Mirjana Đanović Stanić, rukovodilac Stručne službe za poslove Gradskog vijeća

Predsjedavajući Komisije je u 15.07 sati otvorio sjednicu Komisije, pozdravio prisutne i utvrdio kvorum za punovažan rad i odlučivanje.

Sjednica je započela razmatranjem i usvajanjem Zapisnika o radu 41. sjednice Komisije za Statut i akte Gradskog vijeća Grada Sarajeva održane 12.09.2022. godine sa osam glasova „za“ i jednim „suzdržanim“ glasom.

Na prijedlog Predsjedavajućeg, Komisija za Statut i akte je jednoglasno usvojila sljedeći **dnevni red**:

1. Razmatranje primjedbi, prijedloga i sugestija na Nacrt Statuta Grada Sarajeva
2. Mišljenje o Prijedlogu Deklaracije o osudi stavova Zorana Milanovića prema Bosni i Hercegovini
3. Tekuća pitanja

*TAČKA 1.*

*Razmatranje primjedbi, prijedloga i sugestija na Nacrt Statuta Grada Sarajeva*

Predsjedavajući Komisije je konstatovao da su u javnoj raspravi na Nacrt Statuta Grada Sarajeva svoje primjedbe, prijedloge i sugestije dostavili Općina Stari Grad Sarajevo, Pravobranilaštvo Grada Sarajeva i Klub vijećnika Naše stranke u Gradskom vijeću Grada Sarajeva, te predložio da se Komisija za Statut i akte očituje o pristigim primjedbama, prijedlozima i sugestijama na Nacrt Statuta Grada Sarajeva, a kako bi se sačinio Izvještaj o provedenoj javnoj raspravi na Nacrt Statuta Grada Sarajeva.

Nihad Uk, član Komisije je u 15.11 sati napustio sjednicu zbog ranije preuzetih obaveza.



Komisija za Statut i akte je razmotrila primjedbe, prijedloge i sugestije **Općine Stari Grad Sarajevo – Općinskog načelnika** i očitovala se **kako slijedi**.

**I.** Komisija za Statut i akte je razmotrila **prijedlog 1)** - U članu 5. stav 1. iza teksta Općine Stari Grad Sarajevo, dodati tekst „...u nadležnostima definisanim ovim Statutom...“

Obrazloženje: Jedinice lokalne samouprave među kojima spadaju i navedene općine (Stari Grad, Centar, Novi Grad i Novo Sarajevo) imaju svoje propisane nadležnosti. Smatramo da je potrebno gore navedeno dodati obzirom da se na taj način razgraničavaju nadležnosti koje Grad Sarajevo ima kao jedinica lokalne samouprave na teritorijama četiri gradske općine koje ulaze u sastav Grada Sarajeva, u odnosu na posebne nadležnosti koje općine kao jedinice lokalne samouprave imaju.

*Očitovanje predlagača:* Prijedlog 1) se ne prihvata sa sedam glasova „za“ i jednim „suzdržanim“ glasom, uz obrazloženje da je Statut usklađen sa Ustavom Kantona Sarajevo gdje su utvrđene nadležnosti Grada Sarajeva, a imajući u vidu da su i gradske općine dužne uskladiti svoje nadležnosti sa Ustavom Kantona Sarajevo.

**II.** Komisija za Statut i akte je razmotrila **prijedlog 2)** - Član 7. (Simboli) propisuje:

„Grad Sarajevo ima grb i zastavu, kao i druge simbole o kojima posebnom odlukom odlučuje Gradsko vijeće.“

*Smatramo da prethodno navedena formulacija nije adekvatna Statutu glavnog grada, te da se u samom Statutu mora propisati odnosno opisati izgled grba i zastave Grada Sarajeva, kao i navesti konkretno koje „druge simbole“ Grad Sarajevo ima.*

*Također, u vezi s tim, potrebno je propisati i način upotrebe grba i zastave Grada Sarajeva.*

*Očitovanje predlagača:* Prijedlog 2) se ne prihvata sa sedam glasova „za“ i jednim „suzdržanim“ glasom, uz obrazloženje da Gradsko vijeće Odlukom o grbu i zastavi Grada Sarajeva uređuje izgled grba i zastave, a odlukom o upotrebi grba, imena i isticanja zastave Grada Sarajeva te Uputstvom gradonačelnika o primjeni odredbi te odluke uređuje druga pitanja iz prijedloga.

**III.** Komisija za Statut i akte je razmotrila **prijedlog 3)** - Brisati ili izmijeniti član 10.

Obrazloženje: Sjedište Grada Sarajeva kao jedinice lokalne samouprave je promjenjiva kategorija. U slučaju da dođe do potrebe za izmještanjem sjedišta Grada Sarajeva, onda je potrebno mijenjati Statut, što smatramo suvišnim obzirom da je pitanje sjedišta tehničko pitanje, te smatramo da je potrebno isto zaobići prilikom usvajanja Statuta Grada Sarajeva, pri tome ne zanemarujući činjenicu da je članom 97. propisano da je za izmjenu Statuta u pogledu ovog pitanja potrebna dvotrećinska većina od ukupnog broja gradskih vijećnika, uključujući najmanje po četiri gradska vijećnika iz reda Bošnjaka, Hrvata, Srba i jednog iz reda Ostalih. Ukoliko predlagač isključivo insistira na ovoj provedbi predlažemo da ona glasi: „Sjedište Grada Sarajeva je u Sarajevu.“

*Očitovanje predlagača:* Prijedlog 3) se ne prihvata sa sedam glasova „za“ i jednim „suzdržanim“ glasom, uz obrazloženje da Gradsko vijeće odlučuje o sjedištu Grada Sarajeva u zgradi koja je vlasništvo Grada Sarajeva i zadržava kontinuitet sjedišta iz ranijeg Statuta. Sadržaj Statuta Grada Sarajeva je izrađen u okviru odredbi Ustava FBiH, Amandman XVI i Amandman XXVI, te Ustava Kantona Sarajevo, Amandman L.

**IV.** Komisija za Statut i akte je razmotrila **prijedlog 4)** - U članu 13. stav 2. iza riječi aneksima, dodati „...i ratificiranim konvencijama i drugim međunarodnim aktima koji se tiču zaštite ljudskih prava...“

Obrazloženje: Ustav Bosne i Hercegovine datira iz 1995. godine sa svim svojim aneksima. U odnosu na vremenski period usvajanja ovog Statuta, kao primjer možemo navesti činjenicu da je Bosna i Hercegovina u maju 2007. godine na Generalnoj skupštini UN izabrana za punopravnu članicu UN Vijeća za ljudska prava. U tom pogledu nisu zanemarive odluke i akti koje su od perioda donošenja ustava sa svim svojim aneksima donesene, usvojene i ratificirane do perioda donošenja ovog Statuta. Također nije zanemariv ni postupak procesa pridruživanja Evropskoj uniji i postupak regionalne saradnje. U tom pogledu 2019. godine u Poznanu, usvojena je i Deklaracija partnera Zapadnog Balkana o integraciji Roma/kinja u sklop procesa proširenja Evropske unije.

*Očitovanje predlagača:* Prijedlog 4) se prihvata sa sedam glasova „za“ i jednim „suzdržanim“ glasom.

**V.** Komisija za Statut i akte je razmotrila **prijedlog 5)** - U članu 17. stav 1. i članu 79. stav 2. – riječ isključive nadležnosti zamijeniti sa vlastite nadležnosti, radi usklađivanja terminologije, a u Nacrtu Statuta se osim na ovom mjestu ne spominje isključiva nadležnost. Ukoliko predlagač smatra da Grad kao jedinica lokalne samouprave ima isključivu nadležnost, pored vlastite nadležnosti onda je potrebno definisati istu, ali u skladu sa relevantnim zakonskim i podzakonskim aktima.

*Očitovanje predlagača:* Prijedlog 5) se prihvata sa sedam glasova „za“ i jednim „suzdržanim“ glasom.

**VI.** Komisija za Statut i akte je razmotrila **prijedlog 6)** - Primjedba na član 18. stav (1) tačka i) Nacrta Statuta Grada Sarajeva, Vlastita nadležnost Grada ne može biti „Određivanje imena ulica i trgova na području Grada“ (u konkretnom slučaju radi se o vrsti poslova za koje su nadležni i Općina, kao i nadležna komisija Skupštine Kantona Sarajevo).

Također, u članu 18. stav (1), tačka g) navodi se da je vlastita nadležnost Grada Sarajevo:

*Upravljanje, finansiranje i unaprjeđenje djelatnosti i objekata gradske komunalne infrastrukture u skladu sa Ustavom KS, a naročito: gradska groblja, mostovi od posebnog značaja za Grad, ulična gradska rasvjeta i gradski parkovi.*

Imajući u vidu da je Općina Stari Grad Sarajevo ulagala značajna sredstva u sanaciju i održavanje javne rasvjete, kao i gradskih parkova u prethodnim godinama, predlažemo da po usvajanju ovog Statuta zahtijeva od Grada Sarajevo da preuzme svoje obaveze.

*Očitovanje predlagača:* Prijedlog 6) se ne prihvata sa sedam glasova „za“ i jednim „suzdržanim“ glasom, uz obrazloženje da su vlastite nadležnosti potpuno usklađene sa Ustavom Kantona Sarajevo, Amandman LII. Za očekivati je da će i gradske općine svoje nadležnosti uskladiti sa Ustavom Kantona Sarajevo. Također, vlastite nadležnosti Grada Sarajeva utvrđene Ustavom Kantona Sarajevo, primjenjivati će se u skladu sa zakonskim i drugim propisima kojima Kanton Sarajevo bude uredio, odnosno stvorio uslove za provođenje ovih nadležnosti od strane organa Grada Sarajeva (zakona kojima će se urediti lokalna samouprava u Kantonu Sarajevo), komunalne djelatnosti (ubiranje komunalne naknade), javni prihodi i njihova pripadnost takva da Grad Sarajevo može vršiti Ustavom propisane nadležnosti **i sl.**

**VII.** Komisija za Statut i akte je razmotrila **prijedlog 7**) - U Nacrtu Statuta član 18. stav (1) ne postoje odredbe koje direktno definišu postojanje Šestoaprilske nagrade. Član 31. stav (1) tačka r) propisuje da Gradsko vijeće donosi odluke o nagradama i priznanjima Grada Sarajeva. Imajući u vidu da je Šestoaprilska nagrada najznačajnije priznanje koje dodjeljuje Grad Sarajevo, smatramo da prethodno navedena formulacija nije adekvatna za Statut Grada Sarajeva, te da je potrebno posebno definisati postojanje navedene nagrade kao i eventualno druga pitanja od značaja za dodjelu iste.

*Očitovanje predlagača.* Prijedlog 7) se prihvata sa sedam glasova „za“ i jednim „suzdržanim“ glasom.

**VIII.** Komisija za Statut i akte je razmotrila **prijedlog 8**) - U članu 33. stav (1) Nacrta Statuta Grada Sarajeva, izvršena je izmjena u broju zamjenika predsjedavajućeg Gradskog vijeća, te je umjesto dosadašnjeg regulisanja izbora 2 zamjenika predsjedavajućeg, propisan izbor 3 zamjenika predsjedavajućeg Gradskog vijeća Grada Sarajeva, a za koju promjenu nije vidljiv pravni osnov.

*Očitovanje predlagača je usvojeno* sa sedam glasova „za“ i jednim „suzdržanim“ glasom: Budući da se ne radi o prijedlogu, Predlagač se nije mogao očitovati, a predloženo rješenje je politički dogovor

**IX.** Komisija za Statut i akte je razmotrila **prijedlog 9**) - U članu 43. Nacrta Statuta Grada Sarajeva, propisan je Izbor i smjena Gradonačelnika, te su istom članu izvršene znatne izmjene, bez navedenog pravnog osnova.

*Očitovanje predlagača je usvojeno* sa sedam glasova „za“ i jednim „suzdržanim“ glasom: Budući da se ne radi o prijedlogu, Predlagač se nije mogao očitovati, a predloženo rješenje je politički dogovor s ciljem da se izostavi institucija žrijebanja pri izboru Gradonačelnika, odnosno, da se osigura značajna podrška novoizabranom Gradonačelniku u glasovima gradskih vijećnika.

**X.** Komisija za Statut i akte je razmotrila **prijedlog 10**) - Članove 61. i 66. Nacrta Statuta bi trebalo dopuniti/precizirati na način da organizovanje/sazivanje mjesnih zborova građana „mora biti u saradnji sa Općinom na čijoj teritoriji se nalazi mjesna zajednica/e u kojima se organizuje zbor građana“.

*Očitovanje predlagača:* Prijedlog 10) se ne prihvata sa sedam glasova „za“ i jednim „suzdržanim“ glasom, uz obrazloženje da je saradnja s gradskim općinama uređena u članu 87. Nacrta Statuta Grada Sarajeva, te je nije potrebno posebno isticati u članu 61, odnosno 62.

**XI.** Komisija za Statut i akte je razmotrila **prijedlog 11**) - Član 76. stav (1) propisuje: „Imovinu Grada Sarajeva čine pokretna i nepokretna imovina, a imovinom se smatraju stvari, prava i novčana sredstva stečena raspodjelom imovine između Kantona Sarajevo, Grada Sarajeva i gradskih općina na način koji omogućuje Gradu Sarajevu obavljanje njegovih nadležnosti, kupovinom ili na drugi način, u skladu sa zakonom.“

Smatramo da dio navedene odredbe i to riječi “na način koji omogućuje Gradu Sarajevo obavljanje njegovih nadležnosti” treba izbrisati, zbog toga što prethodni dio nakon navedenih riječi jasno definiše šta se smatra imovinom i da je ta imovina do ovoga momenta stečena raspodjelom između Kantona Sarajevo, Grada Sarajeva i gradskih općina, te da je to imovina stečena kupovinom ili na drugi način, u skladu sa zakonom.

*Očitovanje predlagača:* Prijedlog 11) se ne prihvata sa sedam glasova „za“ i jednim „suzdržanim“ glasom, uz obrazloženje da je odredba o raspodjeli imovine uvrštena u vezi sa Zakonom o principima lokalne samouprave u Federaciji Bosne i Hercegovine i Presudom Ustavnog suda Bosne i Hercegovine, broj U-18/09 od 26. januara 2010. godine.

**XII.** Komisija za Statut i akte je razmotrila **prijedlog 12)** - Brisati član 99.

Obrazloženje: Grad kao jedinca lokalne samouprave ravnopravan je sa općinom kao jedinicom lokalne samouprave. Smatramo da je ovaj član potrebno brisati iz razloga što je općina kao jedinica lokalne samouprave dužna uskladiti svoje pravne akte sa Ustavom kao najvišim pravnim aktom u Bosni i Hercegovini, Federaciji Bosne i Hercegovine i Kantonu Sarajevo, te zakonima i podzakonskim aktima koje donose Bosna i Hercegovine, Federacija Bosne i Hercegovine i Kanton Sarajevo. Činjenica je da Grad Sarajevo čine četiri gradske općine, ali jednako tako treba napomenuti da je općina kao jedinica lokalne samouprave samostalna, te da se njeni pravni akti usklađuju sa višim pravnim aktima, a ni u kojem slučaju sa aktima jednakog nivoa. U tom pogledu smatramo i da je presudno donošenje Zakona o lokalnoj samoupravi Kantona Sarajevo, čime bi ovo pitanje bilo jasno definisano, a što je ujedno i obaveza propisana u Zakonu o principima lokalne samouprave u FBiH, ali i međunarodno priznati prava na lokalnu samoupravu među kojima izdvajamo i Evropsku povelju o lokalnoj samoupravi, a što je između ostalog u dostavljenom obrazloženju Nacrta Statuta Grada Sarajeva i navedeno.

*Očitovanje predlagača:* Prijedlog 12) se prihvata sa sedam glasova „za“ i jednim „suzdržanim“ glasom, uz obrazloženje da su općine svakako dužne uskladiti svoje statute sa Ustavom Kantona Sarajevo i sa zakonom.

**XIII.** Komisija za Statut i akte je razmotrila **prijedlog 13)** - U članu 100. se nalazi tehnička greška odnosno potrebno je izbrisati navodne znakove na početku i kraju rečenice odnosno stava.

*Očitovanje predlagača:* Prijedlog 13) se jednoglasno prihvata.

**XIV.** Komisija za Statut i akte je razmotrila **prijedlog 14)** - Nadalje, članom 101. Nacrta Statuta Grada Sarajeva propisana je objava i stupanje na snagu Statuta, u kojoj su napravljeni izuzeci od stupanja na snagu odredaba člana 33. stav (1) i člana 44. stav (2), koje stupaju na snagu nakon Lokalnih izbora Bosne i Hercegovine, a što nije u skladu sa odredbama člana 21. stav (4) i (5) Pravila i postupaka za izradu zakona i drugih propisa Federacije BiH („Službene novine Federacije BiH“, broj 71/14), a kojima se članom 1. stav (2) preporučuje nosiocima normativnih poslova u kantonima, općinama i gradovima da primjenjuju pravila za izradu propisa.

*Očitovanje predlagača:* Prijedlog 14) se djelomično prihvata sa sedam glasova „za“ i jednim „suzdržanim“ glasom, uz napomenu da je Poslovníkom Gradskog vijeća Grada Sarajeva propisano da se propisi izrađuju u skladu s Jedinístvenim pravilima za izradu pravnih propisa u institucijama Bosne i Hercegovine („Službeni glasnik Bosne i Hercegovine“, broj 11/05).

**XV.** Komisija za Statut i akte je razmotrila **prijedlog 15)** - S obzirom na čestu potrebu upotrebe službenih naziva organa uprave, a u ovom slučaju „Grad Sarajevo“ u nazivima određenih pravnih lica, smatramo da bi u Statutu bilo poželjno propisati odredbu koja će predstavljati osnov za korištenje navedenog naziva. U vezi sa prethodno navedenim, odredba bi mogla da ima sljedeću formulaciju:

„Član X.

Naziv „Grad Sarajevo“ može se upotrebljavati u nazivima pravnih lica u skladu sa odlukom koju donosi Gradsko vijeće.“

*Očitovanje predlagača:* Prijedlog 15) se ne prihvata sa sedam glasova „za“ i jednim „suzdržanim“ glasom, budući da se upotreba imena Grada Sarajeva uređuju posebnim gradskim propisom.

Srđan Simonović, prisutan po ovlaštenju umjesto Alme Čengić, članice Komisije je u 15.34 sati napustio sjednicu.

**XVI.** Komisija za Statut i akte je razmotrila **prijedlog 16)** – U Nacrtu Statuta je izostavljen član Statuta koji bi regulisao „Zajedničko obavljanje nadležnosti i poslova Grada Sarajeva i Općina u sastavu Grada“ (predložemo razmatranje).

*Očitovanje predlagača:* Prijedlog 16) se ne prihvata sa sedam glasova „za“, budući da se Statutom Grada Sarajeva ne mogu utvrđivati nadležnosti općina u sastavu Grada, već su općine dužne uskladiti svoje statute s Ustavom Kantona Sarajevo, a zajedničko obavljanje nadležnosti urediti uz primjenu odgovarajućih zakona.

**XVII.** Komisija za Statut i akte je razmotrila **prijedlog 17)** - U Nacrtu Statuta ne postoje odredbe koje definišu postojanje „počasnog građanina Grada Sarajeva“ odnosno odredbe koje propisuju ko odlučuje o proglašenju počasnog građanina Grada Sarajeva. Kako je ovo značajno pitanje za jedan grad, a naročito glavni grad države, smatramo da Statut glavnog grada mora da sadrži navedene odredbe.

*Očitovanje predlagača:* Prijedlog 17) se prihvata sa sedam glasova „za“, uz obrazloženje Komisije da je „Počasni građanin Grada Sarajeva“ priznanje specifično za Grad Sarajevo, te ga se može uvrstiti u Statut.

Komisija za Statut i akte je razmotrila primjedbe, prijedloge i sugestije **Kluba vijećnika Naše stranke** u Gradskom vijeću Grada Sarajeva i očitovala se **kako slijedi**.

**I.** Komisija za Statut i akte je razmotrila **prijedlog 1)** - U Članu 28. stav (6) mijenja se i glasi:  
Izbori u općinskom vijeću za Gradsko vijeće su javni i vrše se dizanjem ruke, glasačkog kartona ili upotrebom elektronskog sistema.

*Očitovanje predlagača:* Prijedlog 1) se ne prihvata sa šest glasova „za“ i jednim „suzdržanim“ glasom, uz obrazloženje da se Statutom Grada Sarajeva ne mogu uređivati poslovnička pitanja općinskih vijeća gradskih općina.

Dženan Tikveša, zamjenik Predsjedavajućeg Komisije je u 15.45 sati napustio sjednicu zbog ranije preuzetih obaveza.

**II.** Komisija za Statut i akte je razmotrila **prijedlog 2)** - U članu 33. stav (7) mijenja se i glasi:  
Predsjedavajući i zamjenici predsjedavajućeg mogu biti i ranije razriješeni većinom glasova izabranih gradskih vijećnika, nakon čega se biraju novi predsjedavajući, odnosno zamjenici predsjedavajućeg.

*Očitovanje predlagača:* Prijedlog 2) se može prihvatiti, ali tako da se utvrdi kvorum za rad sjednice pri odlučivanju kakav je propisan za konstituiranje Gradskog vijeća, te da se utvrdi da se Predsjedavajući i zamjenici Predsjedavajućeg, Gradonačelnik i zamjenici Gradonačelnika razrješavaju, odnosno biraju novi poslije razrješenja, nadpolovičnom većinom na sjednici Gradskog vijeća koja se saziva kao posebna. (Komisija se opredjelila da još jednom razmotri ovo pitanje na svojoj sljedećoj sjednici).

**III.** Komisija za Statut i akte je razmotrila **prijedlog 3)** - Član 67. stav (2) mijenja se i glasi:

Za pokretanje građanske inicijative potrebno je osigurati 3% potpisa građana, koji su upisani u biračke spiskove na području Grada Sarajeva.

*Očitovanje predlagača.* Prijedlog 3) se prihvata sa šest glasova „za“, uz obrazloženje da je Grad Sarajevo najmnogoljudnija aglomeracija u Federaciji BiH, te da se određenjem iz Zakona o principima lokalne samouprave, o tome da se neće tražiti potpis više od 5% građana za pokretanje građanske inicijative, za Grad Sarajevo može definirati sa 3%.

**IV.** Komisija za Statut i akte je razmotrila **prijedlog 4)** - U članu 77. stav (1) mijenja se i glasi:

Gradsko vijeće donosi: Statut Grada Sarajeva, Poslovnik Gradskog vijeća, Etički kodeks gradskog vijeća, godišnji program rada Gradskog vijeća i Budžet, platformu, strategiju, planski akt, program, preporuku, smjernicu, deklaraciju, rezoluciju i izjavu, odluku, izvještaj, informaciju i zaključak (u daljnjem tekstu: akt) i druge akte iz nadležnosti Gradskog vijeća Grada Sarajeva, u skladu sa zakonom.

*Očitovanje predlagača:* Prijedlog 4) se prihvata, jednoglasno sa šest glasova „za“, uz obrazloženje da se u tekst stava 1. člana 77. Nacrta Statuta Grada Sarajeva za prijedlog uvrsti tekst „*Etički kodeks izabranih zvaničnika Grada Sarajeva*“, a zadrži i tekst, „politiku Grada Sarajeva za mandatni period“, budući da je to dokument kojim izvršni organ, gradonačelnik predlaže okvir politike Grada Sarajeva Gradskom vijeću, donosiocu politike, na razmatranje i usvajanje, kako bi se utvrdila osnovna politička opredjeljenja zvaničnika Grada Sarajeva u mandatnom periodu koja će biti okvir i oslonac organima Grada Sarajeva i gradskoj administraciji za predlaganje, odnosno donošenje zakonom propisanih strateških i planskih dokumenata i njihovo provođenje. Opće je poznato da izabrani zvaničnici u demokratskom društvu, na početku svog mandata, uobičajeno u okviru prvih 100 dana mandata, predstave javnosti planove za djelovanje u toku mandata.

Komisija za Statut i akte je razmotrila primjedbe, prijedloge i sugestije **Pravobranilaštva Grada Sarajeva** i očitovala se **kako slijedi**.

**I.** Komisija za Statut i akte je razmotrila **prijedlog 1)** - U uvodu Nacrta Statuta Grada Sarajeva kao pravni osnov za donošenje Statuta se navode Amandmani na Ustav Federacije BiH, te odredbe Zakona o principima lokalne samouprave u Federaciji BiH.

Smatramo da je neophodno kao pravni osnov za donošenje Statuta Grada Sarajeva navesti Ustav Kantona Sarajevo Amandman i na član 4. Ustava Kantona Sarajevo (“Sl.novine Kantona Sarajevo”, broj 16/97) kojim je Grad Sarajevo u sadašnjem obliku i uveden kao nova jedinica lokalne samouprave u Kantonu Sarajevo.

*Očitovanje predlagača:* Prijedlog 1) će se razmotriti na narednoj sjednici Komisije za Statut i akte, jer se potrebno odrediti o tome treba li preambula sadržavati samo osnov koji daje nadležnost Gradskom vijeću za donošenje Statuta, ili treba sadržavati i druge propise iz kojih se crpi osnov za primjenu

određenih rješenja u Statutu (kao što su Izborni zakon, Zakon o državnoj službi, Zakon o organizaciji organa uprave...).

**II.** Komisija za Statut i akte je razmotrila **prijedlog 2)** - Odredbe člana 8. stav 2. Nacrta Statuta Grada Sarajeva propisuju da "Sadržaj pečata je sljedeći:" Bosna i Hercegovina - Federacija Bosne i Hercegovine" u prvom koncentričnom krugu, "Kanton Sarajevo - GRAD SARAJEVO" u drugom koncentričnom krugu i naziv organa u trećem koncentričnom krugu".

Budući da se administracija Gradske uprave Grada Sarajeva sastoji od gradskih službi, to predlažemo da je u članu 8. stav 2. iza riječi naziv organa potrebno dodati riječi "ili službe".

*Očitovanje predlagača:* Prijedlog 2) se ne prihvata sa šest glasova „za“, uz obrazloženje da se Zakonom o principima lokalne samouprave (član 12.) propisuje da su organi grada gradsko vijeće i gradonačelnik, a Zakon o organizaciji organa uprave u Federaciji BiH (član 32, član 49, te član 147.) propisuje da su organi uprave u jednicama lokalne samouprave gradske službe za upravu, kao i to da se na stručne i druge službe primjenjuju odredbe tog zakona, te nije potrebno širiti sadržaj ove odredbe.

**III.** Komisija za Statut i akte je razmotrila **prijedlog 3)** - U odredbama člana 16. stav 2. tačka a) Nacrta Statuta Grada Sarajeva navedeno je "... i dokumente tajnog karaktera ...".

Ističemo da gradskim propisima trenutno nije definisano da bilo koji dokument ima tajni karakter, stoga trebalo bi gradskim propisom definisati koji su akti tajnog karaktera, koji mogu dobiti takvu oznaku, kako se i ko sa njim može postupati.

Stoga sugestija da se predmetna odredba uskladi sa važećim propisima.

*Očitovanje predlagača:* Prijedlog 3) se ne prihvata sa šest glasova „za“, uz obrazloženje da Zakon o principima lokalne samouprave u Federaciji BiH (član 100.) sadrži definiciju kakva je sadržana u Nacrtu Statuta Grada Sarajeva.

**IV.** Komisija za Statut i akte je razmotrila **prijedlog 4)** - U odredbama člana 18. stav 1. tačka d. se navodi "utvrđivanje i provođenje politike planiranja i uređenja prostora...".

U odredbama Zakona o prostornom uređenju KS navodi i koristi se termin urbano planiranje, stoga je sugestija da se u predmetnoj odredbi koristi pravilna terminologija sukladno odredbama Zakona o prostornom uređenju.

*Očitovanje predlagača:* Prijedlog 4) se ne prihvata sa šest glasova „za“, uz obrazloženje da Zakon o principima lokalne samouprave u Federaciji BiH (član 8.), kao i Ustav Kantona Sarajevo (član 4d) sadrže definiciju kakva je sadržana u Nacrtu Statuta Grada Sarajeva.

**V.** Komisija za Statut i akte je razmotrila **prijedlog 5)** - Odredbe člana 18. stav 1. tačka e. Nacrta Statuta Grada Sarajeva propisuju kao nadležnost Grada Sarajeva "utvrđivanje politike korištenja i utvrđivanje visine naknade za korištenja javnih dobara".

Ističemo da odredbe člana 7. stav 1. Zakona o stvarnim pravima FBiH propisuju da "Nisu sposobni biti objektom prava vlasništva i drugih stvarnih prava oni dijelovi prirode koji po svojim osobinama ne mogu biti u vlasti niti jedne fizičke ili pravne osobe pojedinačno, nego su na upotrebi svih, kao što su to atmosferski zrak, voda u rijekama, jezerima i moru, te morska obala (opća dobra)", dok odredbe stava 2. istog člana propisuju da "Javna dobra su stvari koje su po zakonu namijenjene da služe svima pod jednakim uvjetima, kao što su: javni putevi, ulice, trgovi i sl. Na javna dobra se primjenjuju pravila koja važe za opća dobra, ako zakonom nije šta drugo određeno".



Obzirom na navedene odredbe Zakona o stvarnim pravima jasno je određeno šta su javna dobra i eksplicitno je propisano da ista nisu sposobna biti objektom prava vlasništva i drugih stvarnih prava, te da su ista namjenjena da služe svima pod jednakim uvjetima. Ukoliko se Grad odluči da vodi brigu, upravlja i odgovora za određeno javno dobro, to ne podrazumjeva da ima zakonsku mogućnost da utvrđuje visinu naknade za korištenje, kao i da vrši naplatu iste.

*Očitovanje predlagača:* Prijedlog 5) se ne prihvata sa pet glasova “za i jednim “suzdržanim” glasom, uz obrazloženje da, u skladu sa citiranom odredbom u obrazloženju ovog prijedloga: “Na javna dobra se primjenjuju pravila koja važe za opća dobra, ako zakonom nije šta drugo određeno”, zakonima se daje u nadležnost jedinicima lokalne smouprave, pa tako i Gradu Sarajevo da upravlja određenim javnim dobrima i da ih ustupa na korištenje pod određenim uslovima (Primjer je Zakon o vodama FBiH, odnosno Zakon o vodama KS na osnovi kojeg Grad Sarajevo donosi svoj propis o upravljanju i korištenju uređenih vodotoka), a uz konstataciju da će se prijedlog ponovno razmotriti na sljedećoj sjednici Komisije za Statut i akte.

\*\*\*

Poslije rasprave o posljednjem razmatranom prijedlogu pristiglom u javnoj raspravi, Predsjedavajući Komisije je predložio da se rad po ovoj tački dnevnog reda nastavi na sljedećoj sjednici, budući da se rad Komisije odvijao na granici kvoruma jer je dio članova Komisije morao napustiti sjednicu radi drugih obaveza.

Sa iznesenim prijedlogom su se usaglasili prisutni članovi Komisije.

## **TAČKA 2.**

### *Mišljenje o Prijedlogu Deklaracije o osudi stavova Zorana Milanovića prema Bosni i Hercegovini*

Na prijedlog Predsjedavajućeg, Komisija za Statut i akte je jednoglasno usvojila sljedeći **zaključak:**

Komisija za Statut i akte konstatuje da je predloženi akt dostavljen od strane ovlaštenog predlagača, po propisanoj proceduri u propisanoj formi, na osnovu Statuta Grada Sarajeva i Poslovnika Gradskog vijeća Grada Sarajeva, u skladu s Ustavom i Zakonom, te sugeriše Gradskom vijeću Grada Sarajeva da razmatra *Deklaraciju o osudi stavova Zorana Milanovića prema Bosni i Hercegovini* kako je predložena.

## **TAČKA 3.**

### *Tekuća pitanja*

Pod ovom tačkom dnevnog reda nije bilo zaključaka.

**PREDSJEDAVALJUĆI KOMISIJE**

*Toni Vukadin, s.r.*

Predsjedavajući Komisije je u 15.57 sati zaključio rad 42. sjednice Komisije za Statut i akte Gradskog vijeća Grada Sarajeva.